

gustav / February 12, 2014 11:41PM

[云何善男子善女人，諸貧匱者，可得富饒，諸有疾病，令無疾病？ ... 《佛說雨寶陀羅尼經》](#)

◎

如是我聞：一時薄伽梵住憍跋彌國建吒迦林，與大苾芻眾五百人俱，又與多諸大菩薩摩訶薩俱。時憍跋彌國中有一長者，名曰妙月，諸根寂靜，心意寂靜，多有男女及多僮僕，淨信成就，往詣佛所，頭面禮足，繞百千匝，卻住一面，合掌恭敬，而白佛言：「世尊！欲問如來應正等覺，少有所疑事，唯願大慈垂愍聽許！」

爾時世尊告長者言：「恣汝意問，當為汝說，令汝心喜。」

時彼長者聞是語已，歡喜踊躍：「世尊！云何善男子、善女人諸貧匱者，可得富饒，諸有疾病令無疾病？」

爾時世尊告妙月長者言：「何緣作如是問？」

時彼長者重白佛言：「世尊！我等在家多諸眷屬，資財乏少，難可支濟，又多疾病。唯願世尊開示法要，當令貧者永離貧窮，倉庫財寶皆悉盈滿，存濟家中妻子、男女眷屬，有來求者，必生歡喜。為大施主，使諸倉庫、金銀、珍寶、如意摩尼、金剛諸珍、商估、室羅、赤珠、碼瑙、金寶之類豐饒，無有盡竭，周給親屬，廣修惠施，饒益有情。」

爾時世尊告妙月長者言：「善男子！我於過去阿僧祇劫前遇佛世尊，名持金剛海音如來應正遍知，從彼如來受得此雨寶陀羅尼，受持讀誦、思惟計念、隨喜為他廣說流布。由此陀羅尼威德力故，若善男子人與非人、藥叉、羅刹、畢隸多、畢舍遮、鳩槃荼、烏娑多羅迦、布單那、羯吒布單那等起惡心者，不能為害。復有諸鬼，噉人脂髓、膿血、涕唾、大小便利，欲來惱者，不能為障礙。」

佛告妙月：「若有善男子心念、手持書寫，但聞名字，受持、隨喜、廣為他敷演者，彼善男子、善女人長夜安隱，受諸快樂，為瑜伽資糧安隱豐饒故。若有人欲受持此雨寶陀羅尼者，應供養一切如來，一夜、二夜，或三夜，專心誦持受敬，淨信三寶。諸天悉皆歡喜，即雨財寶穀麥，為彼讀誦法師故。」

~ 《佛說雨寶陀羅尼經》，唐三藏沙門大廣智不空奉 詔譯 ([CBETA全文](#))

Edited 4 time(s). Last edit at 02/12/2014 11:48PM by gustav.

---